

籌辦夷務始末

籌辦夷務始末卷之七十

同治八年己巳十一月辛未

諭軍機大臣等前因貴州遵義教士因傷殞命疊經諭令曾璧光妥速籌辦並令李鴻章會同辦結李鴻章前派道員余思樞馳往查訪計早抵黔曾璧光諒已派員會辦此案總以教士因何身死為最要關鍵必須質證明確斷不可稍涉含糊現在法國使臣羅淑亞業已出京赴滬聲言欲帶兵船赴川實因川黔教案未結故為此脅制之計若再遷延必致枝節叢生愈難辦理著曾璧光懍遵疊次諭旨嚴飭委員會同余思樞速將此案設法了結不得稍有延宕

壬申禮部奏同治八年十月二十八日准甯古塔副都統烏勒興阿咨報據琿春協領訥木津報稱八月二十七日奉飭前往摩闊歲會晤俄國新設廓米薩爾之官面議兩國交涉事件於中途遇有朝鮮國男婦子女四五十人陸續越界均由珠倫河地方前往海沿去訖問其來歷混行指畫彼此話語不通殊難知其究竟因係俄界未便攔阻卽於回城之日揀派雲騎尉吉爾洪阿等前往海沿一帶密查去後旋據呈報朝鮮國男婦子女現在海沿嚴杵河吉心河等處相聚千有餘人仍有越界者陸續不止因與俄人互目交雜難以查問等語查朝鮮國男婦成羣任意

紛投他邦。何以置之不問。若任各國紛投。閨居日久。或別生蒙瑞。實與中外大有邊礙。除咨行甯古塔副都統烏勒興阿。卽行轉飭琿春協領訥木津。刻卽親赴庫圖。會同該國新設廓米薩爾。將前事逐一告明。務將朝鮮逃越男婦子女。共念和好。悉數飭令逐回。不得久留俄界。以明疆界。而敦友誼。並飭該協領於所屬界之內外。加意嚴防。仍密派妥幹兵役。查明有何動作。迅速飛報外。應咨禮部轉行朝鮮國王。卽將該國逃越俄界之男婦子女。飭令邊界官悉數領回。各安本界。等因到部。旋於十一月初三日。准總理各國事務衙門鈔錄前件咨送前來。臣等查同治六

年二月吉林將軍富明阿等奏朝鮮國人前往俄國吉心河墾地等因一摺經總理各國事務衙門議覆朝鮮居民願赴俄界開墾地畝應由朝鮮早申禁令以免貽患將來等因奉

旨依議欽此由臣部行知朝鮮國王在案今該國民人潛投俄界復聚至千餘名之多續投者仍紛紛不止洵難免不別生釁端既據該將軍咨稱已飭琿春協領訥木津會商俄國廓米薩爾務將朝鮮國男婦子女悉數飭令逐回不得久留俄界以明疆界而敦友誼等語除擬由臣部行知朝鮮國王即將逃赴俄界之男婦子女一千餘人飭令邊界官

悉數領回外。應仍由該國王申明禁令。嚴飭沿邊官弁。約束民人。毋得再有逃越。以清疆界。而重邊防。

諭軍機大臣等。前因總理各國事務衙門議覆富明阿等奏。朝鮮國人往俄界墾地。應由朝鮮早申禁令。當諭禮部行文該國王妥為辦理。茲據禮部奏稱。准富明阿轉據甯古塔副都統咨報。琿春協領訥木津。奉飭前往摩闊歲會晤俄官。面議兩國交涉事件。於中途遇朝鮮國男婦四五十人。陸續越界。均由珠倫河前往海沿。問其來歷。言語不通。因係俄界。未便攔阻。旋密查海沿。嚴杆河吉心河等處。已聚集千餘人。續投者尚紛紛不止。請由該部行文該國王。飭令邊界官悉數領回等語。朝鮮國民人

潛投俄界男婦成羣。竟至千餘名口之多。難保不愈聚愈眾。該國王自應及早禁止。庶不至別滋釁端。著禮部迅即行文該國王。將逃赴俄界民人。飭令該國邊界官悉數領回。並由該國王申明禁令。嚴飭該國沿邊官弁。約束民人。毋許再有逃越。以重邊防。並著富明阿飭令訥木津會商俄國廓米薩爾。務將朝鮮越界民人。悉行逐回。不得久留俄界。以致別生枝節。原摺著鈔給富明阿閱看。

癸酉。著安徽巡撫英翰奏。伏查安慶法國教士公寓。係六年九月。換給東右坊民房十二間。居住已經二年。英國教士公寓。係本年六月。自賃西右坊民房五間。居住亦經數

足止係教士公寓。均未建立天主教堂。亦無耶穌書院名目。雖地方間有流言。及匿名揭貼等件。經該府縣官隨時彈壓。尚屬相安。本月初一等日。忽據署安慶府知府何宗聰等先後稟報。九月三十日。正值各屬考童雲集之時。英國教士密道生。衛養生。生輪出門。被各童攔阻。該教士堂。即避入道署。各童及間雜人等。擁入該寓。拋毀什物。道府縣趕到。將密道生之妻並幼子保護。均各無恙。正彈壓間。又報法國教士公寓。亦被士民擁入滋鬧。該府縣復趕緊前往。據看寓人聲稱。教士金誠三前數日。已往英山。韓石庚。前一日因病已赴上海。家伙等物。均被毀失。惟兩處房

屋木動。密道生。衛養生。欲赴鎮江。經該府等資送。於十月初一日。揭春起程。並稱當數月之先。各屬考童及在城居民。紛傳不願傳教。匿名揭貼。已滿城市。當出示曉諭。詎士民羣起。卒有此事。現在人數逾萬。恐操之太急。激成事端。等語。當經督批。令趕拏為首滋事之人。嚴行懲辦。一面咨馬新貽一體查辦。並屬其尤剴行該二國領事官知照。旋准馬新貽派道員吳世熊。總兵李振名查辦前來。此安慶考童等滋事。據地方稟報。與馬新貽辦理之大概情形也。十六日。英國使臣阿禮國。經過安慶。派其參贊葛納利。進城面請。述為查辦所言情形。與地方所稟略同。並稱

領事之人係夏姓等。當告以此事既指名有人。斷無不
辦之理。惟現在人數太多。須俟十一月杪十二月初。院試
既畢。方能拏辦等語。葛納利回船。該使臣阿禮國復專函
請於五六日辦妥。伊自漢口回時。即不登岸等語。復經
覆以既經應許。自係必辦。縱遲時日。斷不至因其已回。泡
上置之不問。旋得其十九日自漢口覆信。並無異言。該使
臣乘坐輪船。已於二十二日過安慶東駛。十九日。據法國
領事達伯理函中。韓教士公寓被搶。與地方所稟大同小
異。中敘所失之物。則有四千圓之多。請即拏人查物前來。
當將現在趕為辦理情形。剴行上海道涂宗瀛。令其先

為照覆。俟此開辦有頭緒。再為剴履。該領事至今尚未續有函到。此滋事之後。英法二國使臣領事往復商辦之大概情形也。自來中外交涉事件。惟有遵照條約辦理。而斟酌緩急輕重。全在操縱之得宜。此案事起倉卒。禁遏無從。該士民等滋鬧啟釁。雖無傷人折房重情。而顯違條約。自應嚴拏為首滋事之人。照律究辦。以示懲儆。況當法國使臣欲帶兵船尋釁之時。尤宜早為結案。免令藉為口實。惟據該府縣所稱。現在府試。接以院試。生童人數過萬。辦理稍有未協。必致釀成事端。種種棘手。亦係實在情形。幸英人已為允可。法人亦尚未決裂。才惟有謹遵。

諭旨。趕將此案與馬新貽悉心妥酌。無論如何變通設法。總期拿獲滋事之人。賠償所失之物。以便迅速了結。免致彼國藉此要挾。滋生枝節。

諭軍機大臣等。英翰奏。辦理耆童滋事。教士公寓大概情形一摺。安慶城內東右坊西右坊地方。有英法兩國教士居住公寓九間。各屬耆童及閩雜人等。據入英國教士密道生等寓所。拋毀什物。法國教士金誠三等寓內。家伙亦有毀失。尚無傷人拆房等情。現經英翰批飭該地方官。趕緊為首滋事之人。並經馬新貽派道員吳世熊等前往查辦。此案自不難完結。惟英國萬納利所言情形。與地方所稟略同。法國達伯理來函。與地方所

集大同小異。並敍所失之物。數至四千圓之多。此時若再事耽延。難免不另生枝節。馬新貽等仍當據遵前命。嚴飭該府縣官將領首滋事之夏姓等迅速查拏。持平審辦。並飭吳世熊等會同該地方官妥為料理。斷不可稍涉偏縱。致啟弊端。

丁丑。署黑龍江將軍德英奏。竊。德英於九月初三日。往巡呼倫貝爾。帶同署副都統銜總管額爾德尼等。先赴與俄國接壤之額爾圖訥河庫克多博卡倫。俄國瑪雨爾先差俄人二人迎接請安。瑪雨爾怕畢爾帶領俄人十餘名前來請見。才當喚進帳房相見。該瑪雨爾向才摘帽躬身行過夷禮。才諭以循例查閱本境各卡甫經到此。爾即來

見足見恭順兩處交界坐卡人等務須各加約束毋違教
睦為要該瑪兩爾聲稱我等仰慕

天朝高厚務當履行彈壓今蒙將軍面諭愈當加意管理等語視
其形景尚屬謙敬^等示以大方懷柔給賜瑪兩爾飯食並
賞給絲綢布疋靴茶乾果及隨來夷人亦各賞給肉飯綢
布靴茶乾果羊麪等物不勝感激歎顏拜領該瑪兩爾當
面親呈^等哈喇六尺夷毯一包^等視其隨時誠敬物件亦
不貴重即收留以撫其意^等復又賜給江綢二卷繭綢二
疋套布二對南糖二匣稷米白麪各一袋該瑪兩爾亦復
當面拜領加倍歡躍辭去^等旋至呼倫貝爾閱看隊伍面

飭該署總管等與俄官接壤各卡坐守務須小心不時嚴
加防維毋得稍涉怠忽以期仰副我

皇上慎重邊疆操防之至意

御批知道了

戊寅貴州巡撫曾璧光奏遵查遵義府城民教爭鬧起釁
原委實因教民楊希伯於五月初五日扶媒滋鬧糾約教
眾入炎帝廟將做會神壇經像全行打壞維時看戲人眾
共懷不平亦齊赴天主堂將其經堂醫館打毀並傳知府
屬不准再行習教臣接據該府縣稟報即一面出示曉諭
彈壓並委候補道陳昌運馳往查辦旋據該道稟稱五月

十七日到遵後。會同府縣審辦此案。先將籍事搶擄之民人傳有元。訊明正法。民教悉已解散。並無勒令跨越十字架。及跪寫出教甘結情事。惟該處民教積釁已深。現雖極力開導。暫時相安。而賠修經堂情事。一時尚難辦理。勒令布司鐸等先行回省。俟民情稍定。再往傳教。該司鐸以未接省中主教示諭。不敢遽回。稟請裁示。臣以該處民教爭持打毀經堂。不准習教。雖出民間一時公憤。已與條約有礙。辦理殊多棘手。若再將司鐸等別有損傷。益難收拾。當飛飭該道務須明白譬喻。將布司鐸等執行護送至省。以免他虞。該道卽於六月十三日。將司鐸三名帶至省城。忽

於七月初七日。據代辦主教任司鐸照會。趙司鐸到省後。於初六日夜因傷身死。已報明總理各國衙門。嚴辦等語。臣以該司鐸前在遵義。因民教爭鬧。翻牆趨避。腰背閃挫。已據陳昌運稟報業經痊愈。卽沿途同行。亦未見該司鐸有傷重情形。茲據報因傷身死。卽應及時驗明傷痕。以便緝犯究辦。當飭署臬司林肇元委員往驗。嗣據該署臬司詳稱。前委貴陽府知府胡超龍等帶領刑件。迅赴天主堂相驗。趙司鐸屍身有無傷痕。旋據該府等申稱。遵卽會同詣驗。據該主教面稱。趙司鐸屍身業已殮殯浮厝。此刻未便開棺相驗。俟總理衙門派人來黔。再行會驗等語。此遵

義民教爭脚及司鐸趙姓回省身故之實在情形也至梅
司鐸在仁懷被殺一事臣既未接該主教照會亦未據地
方官稟報現已飭司派員往查有無其事另覈辦理臣以
疏庸承

恩疆寄凡遇中外交涉事件仰體

宵旰憂勤無不加意小心持平辦理期於共敦和好日久相安乃

以地居瘠苦不能事事曲全或疑嫉恨條約以致頻煩

諭誠惶悚實深臣具有天良敢不益加審慎迅速完結以副

聖主綏輯中外一視同仁之至意

諭軍機大臣等曾璧光奏復陳教務情形一摺據稱遵義府城民

教爭鬭業委道員陳品運馳往查辦。先將藉事搶擄之民人傳
有元訊明正法。民教悉已解散。並將教士三人。於六月十三日
護送到省。七月初七日。據代辦主教任司鐸照會。趙教士到省
後。於初六日因傷身死。該撫委員往驗。而任主教復以業經殞
唐。未便開棺相驗。攔阻。至梅教士在仁懷被殺一語。有無其事。
已派員往查等語。此案既據曾璧光查明。趙教士並非因傷身
死。該主教又有攔驗情事。即可從此設法了結。折服其心。梅教
士是否被殺。亦應確切查明。現在李鴻章所派之道員余思樞。
計早抵黔。卽著李鴻章。曾璧光。飭令余思樞。並該省委員等。迅
速持平辦理。及早結案。免致羣激。並到後。另生枝節。

總理各國事務恭親王等奏。廣東澳門地方為大西洋占
住。同治元年立約。不能商妥。約仍未換。臣等因聞總稅務
司赫德言及大西洋國近頗貧窶。如能乘機設法辦理。澳
門可望收回。並知日國使臣瑪斯回國。令赫德商之。瑪斯
於七年五月。派稅務司金登幹。隨同瑪斯前往幫辦。各在
案。嗣因大西洋國忽有變故。瑪斯不克前往辦理。至本年
正月十四日。接總稅務司赫德中丞。據稅務司金登幹函
報。瑪斯於上年十二月間病故。此事或改交出使之蒲安
臣接辦。或徑交金登幹接辦。或俟大西洋國使臣前來議
約再辦。請為示覆。臣等以蒲安臣係派往有約之國出使。

事未完竣。金登幹係幫辦稅務之人。均未便派辦此事。現在瑪斯既已病故。經理無人。且大西洋國及各國均未知有此舉。自可暫行停待。另候尋商。當飭赫德信致金登幹。令將前頒

國書暨文件繳回。所議經費銀兩。亦毋庸豫備。茲於十月二十八日。據將前頒

國書。並臣衙門所發文件。一併申繳前來。臣等查大西洋國約雖議定。因設官澳門一節。未能商妥。迄未互換。將來大西洋國變故稍定。伊必仍來商議。應俟彼時再行設法辦理。

御批依議

恭親王等又奏。再臣衙門於同治八年十月二十三日接據署伊犁將軍榮全函稱。圖爾根索倫德勤等。不肯歸附俄國。堅心思返。幸有阿爾瑪圖庫必那圖爾喀勒帕科斯柯依。深知睦鄰大義。極為中原盡心。上年派兵護送索倫。借給烏槍。今年復借給圖爾根德勤烏槍。凡中原人均加照應。若隨時籠絡其心。將來可望有益。查喀勒帕科斯柯依。係俄國巡撫兼總督。分位較崇。給以寶星。尚未相宜。聞俄官最重中原琛服。請由臣衙門奏懇頒賞等因。臣等查洋人為中國出力。奏請

賞給寶星。其有異常出力者。奏請

實加職銜。或崇以章服。應經辦理有案。茲榮全以俄官喀勒帕科
斯柯依。極力為中原盡心出力。若加以榮寵。當更感激圖
報。自應量加優獎。可否仰懇

恩施。俯如該署將軍所請。實給該俄官喀勒帕科斯柯依蟒衣一
襲。大小荷包一對。以示鼓勵。如蒙

允准。臣衙門卽照會俄國住京公使知照。並將蟒服荷包照辦。寄
交署伊犁將軍榮全。飭令該俄官祇領。

御批。依議。

恭親王等又奏。再同治八年九月間。據英國使臣阿禮國
照會內稱。該使臣於九月二十九日出京。由沿海沿江巡

查事畢回國該使臣離京之日所有一切公務歸副參贊
傅彞斯暫為代護俟署理之威妥瑪到京即行交卸等因
當經臣等於阿禮國臨行致送綉緞覽器等件旋據該使
臣以洋覽器皿等件酬答現飭存儲署庫茲於十月二十
五日新任署使臣威妥瑪到京二十九日來臣衙門謁見
臣等分日前赴該館答禮

御批知道了

壬午總理各國事務恭親王等會同戶部奏同治八年十
月二十二日軍機處鈔出署伊犁將軍榮全據索歸補俄
國賠款請於津海關或北洋三口於俄國應納稅餉內照

數扣收一片奉

旨該衙門議奏。欽此。臣等伏思此項賠款。誠如該將軍所稱。為權
濟大局起見。勢出萬不得已。惟既以約定於前。難以失信
於後。不得不按年清還。免致因此生釁。除委員薩碧屯。已
還過銀九十八百二十兩外。下餘十萬數千有零。按照原
議。三年補償。寬為籌備。約計三年之內。每年需銀三萬四
千兩。自應籌款撥給。分年補償。以完巨案。至該將軍擬仿
照從前英法兩國兵費扣款章程。或於津海關。或於北洋
三口稅餉內扣收一節。戶部查北洋三口。山海東海兩關。
並無俄國文納貨稅。即天津一關。俄商陸運稅銀項下。每

年亦止一千餘兩。實屬不敷抵扣。臣等公同商酌。擬即在
於山西應解京餉內。自明年為始。分作三年。每年撥三萬
四千兩。應令山西巡撫解交歸綏道庫轉解。務須提前於
每年三月起解。四月解到。著伊犁將軍榮全行營查收。覈
計三年。共應解銀十萬二千兩。其於應賠俄國款項。有無
盈絀。仍令查明酌裁辦理。

諭軍機大臣等。前因榮全奏賠償俄國諾海牲畜銀兩。請於津海
關。或北洋三口。於俄國應納稅餉內照數扣收。當交該衙門議
奏。茲據總理各國事務衙門戶部奏稱。此項賠款。既經榮全議
定。除委員隨帶已還過銀九千八百二十兩外。其餘銀十萬

數千兩有零。按照原議。三年補償。每年需銀三萬四千兩。自應
籌款分年補償。惟北洋三口。山海東海兩關。並無俄國交納貨
稅。即天津一關。俄商陸運稅銀。每年亦止一千餘兩。不敷抵扣。
請於山西應解京餉內。分年籌撥等語。著李宗義飭令藩司。於
山西應解京餉內。自明年為始。分作三年。每年撥銀三萬四千
兩。交歸綏道轉解。務須提前於每年三月起解。四月解到烏里
雅蘇台。交崇全收納。覈計三年。共應解銀十萬二千兩。於應賠
俄國款項。有無盈絀。著福濟。崇全查明辦理。原摺均著鈔給閱
看。

奉親王等又奏。臣等查添設布倫托海鮮事大臣。原係兼

管塔爾巴哈台事務。前據俄國使臣照會。所稱未經立界之瑪呢圖嘎圖勒汗。至哈巴爾蘇一帶。查係塔城所屬。應歸布倫托海辦事大臣兼管之地方。今奉

旨。將布倫托海辦事大臣裁撤。一切事宜。統歸科布多大臣經理。則未經立界之瑪呢圖嘎圖勒汗。至哈巴爾蘇一帶。亦應歸科布多大臣經理。文碩既補授科布多幫辦大臣。此事自係應管之事。惟查科布多立界。前係奎昌一手經理。現既將布倫托海之事。統歸科布多大臣管理。相應請

旨。添派科布多參贊大臣奎昌。會同幫辦大臣文碩商辦。惟塔城本係未曾收復地方。立界應從何處起止。臣等無從懸揣。

其應如何籌議定期建立。並親往分界處所會辦。應請
旨於奎昌、文碩二人內酌派一員。以專責成。至揀派嚮導指授機
宜之處。仍令定邊左副將軍福濟遵照前

旨悉心籌度。總期將該處立界之事一律辦竣。毋貽後患。

諭軍機大臣等。總理各國事務衙門奏請添派立界大員一摺。前
因布倫托海所屬地方。皆係塔爾巴哈台管轄之地。所有分界
事宜。業經諭令文碩約期馳往辦理。惟現在布倫托海大臣既
經裁撤。該處立界事宜。卽應統歸科布多大臣經理。奎昌前與
俄國使臣勘辦科布多邊界。甚屬妥協。情形最為熟悉。著卽改
派奎昌。於明歲春融時。馳往該處。與俄國使臣。將瑪呢圖嘎圖

勒汗。至哈巴爾蘇一帶。逐一查勘。會立牌博。文碩即毋庸前往。其應如何揀派嚮導及指授機宜之處。仍著福濟遵照前旨。悉心籌辦。文碩既補授科布多幫辦大臣。此次分界事宜。亦當會同商議。妥為辦理。原摺均著鈔給閱看。

乙未。烏里雅蘇台將軍福濟。科布多幫辦大臣文碩奏。竊維會分地界。關涉外國。苟能有利於

國家。自應勉竭駑駘。用成厥事。顧有實在空虛情形。行之將多流弊。無益邊陲。有妨

國體之處。亦不敢徒務虛名。因循緘默。而不對切陳之。查原勘東北起沙賓達巴哈舊界末處。向西至惠巖節浩罕之

地延亘數千里分隸烏里雅蘇台科布多伊犁塔爾巴哈
台四城轄境前經明諒於同治三年會同俄官議定地址
繪圖立約次年即應分立牌博詎四年逆回倡亂五年伊
犁塔爾巴哈台相繼失守未能舉行其烏里雅蘇台科布
多等北路二城所屬則因拘泥原約自西向東一語而俄
人並未前來會辦遂亦延闕直至本年始遵

旨經崇舍奎昌會同俄官分建鄂博訖其自瑪呢圖嘎圖勒汗至
哈巴爾蘇塔爾巴哈台屬境及自哈巴爾蘇至慈嶺伊犁
屬境則因該城尚未克復不暇兼辦茲據布策照會欲將
瑪呢圖嘎圖勒汗迤西轉南至哈巴爾蘇塔爾巴哈台屬

境地界分立。渾言平靖地方。先行往建。察其命意。非欲藉
圖侵占。卽爲節費惜勞。蓋彼會辦邊務。必帶兵隊千餘。伴
言護衛使臣復防伏莽之用。今若一律完結。自免往返跋
涉。是其人力經費均省之說。不盡無因。然皆彼國因勢乘
便之利也。若自我論之。自瑪呢圖嘎圖勒汗至哈巴爾蘇。
正當塔爾巴哈台全境西北。該城淪陷數年。外鄰俄境內。
阻賊氛。根本未固。何能以零星散卒先設卡倫。若不設兵
置戍。建立界牌之後。責令何人防守稽查。又何能禁其侵
越。現在逆回勾結賊匪。出沒無常。如前據索倫佐領文德
訥等稟報。該營甫由俄境抵肇塘地方。卽有拜精格特等。

賊窺伺滋擾之事。而棍噶扎爾參性極驕悍。伎倆陰險。前此搶劫哈薩克致賠諾海一案。雖曰倉卒未見新圖。要亦事後枝梧。其實因地就糧。本有意為之。自來勇目性情。惟恐地方無事。故地界甫經立定。又有武旺阿爾定。於齊桑。淖爾俄卡一帶。馬隊闖入搶劫。難保非該喇嘛有以使然。現在不使根究。祇好姑以未撫以前之變民。搪塞俄人。該國乘我有事。輒自獨辦。其曲究竟在彼。縱然狡詐。第外面既以大國自居。或猶可以理論。儻建牌之後。而我兵勇賊匪。時常興釁。禁止勢既不能。彈壓更多棘手。豈不轉授俄人以柄。亦安有如許經費賠耶。此其窒礙一也。塔爾巴哈

台與伊犁毗連。俄將來分訖塔城。又必求分伊犁屬地。更較塔爾巴哈台之流弊。枚舉不暇。俄不如其所請。則二城同一未復。又將何以立言。若謂塔爾巴哈台現有隙地。則伊犁邊界。非無空間之區。況所謂空間。仍係宵匪遁逃之所。卽如近者滋事之吉車克訥山。係附近應分之齋桑澤爾卡倫。乃布策謂為平靖處所。明係欺我不悉邊徼形勢。有意蒙混。安可不事豫防。此其窒礙二也。棼等詳勸布使照會詞氣。似此段界牌。該國已於北路二城歲事之後。潛往先立。其時七月下旬。去霜降尚遠。冰雪未積。尚易施工。且自逆回猖獗。該國於邊界本設防兵。不難徑往。是此節

無待詳查。固可揣情豫度。雖令即今馳往。已屬落後無及。況以中外交涉之事。彼先獨辦。縱無侵佔。而往會之員。豈可俯首無詞。便與會押會印。設再少逾紅綫。爭則恐涉決裂。不爭有妨。

國體亦令俄人輕視。此其窒礙三也。至應行事宜。除照北路二城會辦成案。揀派妥員。設法由間道先往。密探俄人有無私立鄂博。是否侵佔。俟果覆到日。再行奏明分別辦理。外。揆以北路現在利害情形。勢非展緩會分。不可。等籌。商旬日。再四熟思。惟有仍執地方未復。尚多窒礙之成說。與之婉言開導。諒可能有轉圜。無論如何說法。總期就我。

範圍該國之潛往擅立原屬理屈。慮我詰責。故先為此照會。為將來卸過地步。若必識破。恐其羞惱成怒。轉難區處。似不如先向理喻。就其惜費省力一語。微言直摺隱衷。兩國交涉要務。理不應聽先往獨辨。該國既為新惜財力起見。中原仍念素好。姑不深究。然斷不能為憑。將來克復二城。猶必派員覆覈。果與紅錢無差。方能會印畫押。否則仍應照約更正。且自瑪呢圖嘎圖勒汗西南。凡舊日接境各卡倫。於中國官員未及覆覈以前。如有賊匪逆回搶掠該國中原。不能任咎。更不能賠補。將此二節索取該使照會。以為將來憑據。或亦順機利導之一法。洋人伎倆。每與疆

臣辦事於有利者則必力爭。如無所利而又無理則推言
權輕官小。一面進京。串通公使。非蒙混捏飾。卽詞聲聽。
要求總理各國事務衙門。以圖逞其扶制。此各國之通病。
亦不獨俄人之於口外爲然也。且索取照會。亦非該國住
京公使出印。不足爲據。粵文碩擬酌帶緊要圖冊卷宗。趕
於明年正月內進京入。

覲後。與總理各國事務王大臣。將此開情形。章奏未能盡者。詳細
面述。以備採擇。至行文俄人一節。查向來北路地方。必四
月之後。九月半前。方能料理庶務。本年分界。卽約於四月
十一日。而俄使五月方到。秋間歲事。此次粵等既擬展緩。

自毋庸與約期亦不便由外徑行拒絕是以未便行文合
併聲明

諭軍機大臣等。福濟文碩奏俄國請分地界。查有窒礙情形一摺。
塔城分界事宜。前因布倫托海大臣裁撤。改派奎昌於明歲春
融時馳往該處。會同俄使查勘立界。茲覽福濟等摺內所陳窒
礙情形。不為無見。即著文碩酌帶圖冊卷宗。迅即起程。趕於明
年正月內到京。與總理各國事務衙門王大臣詳細面述。妥為
辦理。文碩起身後。該處應行豫辦事宜。仍著奎昌恪遵前旨。與
福濟隨時會商籌辦。

十二月乙亥。總理船政前江西巡撫沈葆楨奏。竊船廠本

年八月間第一號輪船北上之後第二號輪船身鑽蝕各
工已有三分之二。輪機漏鑊俱安排妥貼計船上大端所
短者惟鐵脊鐵梁及桅舵戰坪等件。嗣據日意格議稱前
者第一號輪船下水之後尚需兩三月之久始能出洋者。
以一切零星器械未全。工匠在船操作手足難展。登降殊
煩。致稽時日。此次當移後工為前工。即在架上安置各件
器具。然後下水試輪。少加修飾。便可出洋演駕。當時在事
員紳分廠催趕中外匠作不足兩月之久。大自桅舵舢板
鐵櫃煙箭小至器管水甬欄梯釘鎖。靡不自帆鐵纜油繩
纜盤。精至向盤時表遠鏡湯鐵。一律完備。因擇十一月初

四日○乘午潮入江○臣赴船勘驗○該工匠等如法推船下繫○自在遊行○毫無窒礙○次日在塢前江面升大試輪○輪機亦稱靈便○適該船之管駕官遊擊吳世忠到閩○派令駐船監製旗幟號衣○髹漆內外船板○檢點軍火礮械○申定號令章程○月終當出大洋駕駛○第三號之船○亦於初四日安放龍骨○其船身各百幅○前兩月開分工總辦○業已告齊○展下均已一律關合○年底可上旁艘○第四號現方添累船臺○臺工一畢○便擇日安放龍骨○開造船身○今將第二號輪船下水○暨第三號第四號續造情形○謹會同陝甘總督○臣左宗棠○福州將軍○臣文煜○閩浙總督○臣英樞○福建巡撫○臣卞寶第○

恭摺具奏。

御批。知道了。

甲辰。

諭軍機大臣等。貴州軍務日久未有起色。李鴻章現在重慶。著即馳赴貴州。嚴檄各將領分投進剿。迅奏膚公。遵義民教各案。前據李鴻章奏派道員余思樞赴黔會辦。至今尚未具奏。李鴻章現赴貴州。即著就近會同曾璧光。迅速持平審結。以弭釁端。四川酉陽教案。何以尚未覆奏。亦著一併迅結。毋得稍涉遲延。

壬子。總理各國事務恭親王等奏。十一月二十八日。軍機處文出。奉

上諭。福濟文碩奏。俄官請分地界。查有窒礙情形。一摺等因。欽此。
臣等伏查此案。西疆未定交界。先於咸豐十年續增和約
第二條內。指明自雍正六年所立沙賓達巴哈之界牌末
處起。至浩罕邊界為界。又於同治三年由

欽派會勘西北界大臣明摺等。連

旨與俄使按照議單應分界址。互換託約國誌完案。所有由瑪呢
圖嘎圖勒汗卡倫往西南。至塔爾巴哈台山嶺。該分山陽
仍屬中國。與塔城軍民為便。節經奏明。議准有案。本年烏
科兩城應分界址。辦理將竣。將俄使即有催令新駐布倫
托海辦事大臣文碩前往分界之說。彼時臣銜門以有賊

地方不能辦理而處。詎意俄使於數月後以所需齊備。不
忍再延為詞。擬欲自行建立等情。照會前來。臣衙門當以
事關分界。若聽其獨辦。必致任意多占。即經峻詞駁斥。該
使尚以分界大臣藉端推諉。咄咄漬辯。又經臣衙門婉轉
開導。仍行詰

旨。派員候至來歲春融會同辦理。節經奏明行知。並照覆俄使在
京。是分界係屬已定成局。現擬應分之處。果係有賊。中國
不能前往。俄國亦必不能前往。彼若貿然而去。為賊所阻。
臨時無可藉口。即或我以為賊。彼以為非賊。亦可據理折
辨。況俄使照會內已云該處絕無賊蹤。若我先設詞推脫。

則彼必徑往獨辦其患不可勝言。茲該處應行豫備事宜
現奉

上諭。仍著奎昌恪遵前旨。與福濟隨時會商籌辦。仰見

聖謨廣運。

訓示周詳。臣等不勝欽服。惟恐奎昌見福濟會同文碩先有此奏。
中生疑慮。附和推延。設為俄使窺破隱微。徑行自辦。則失
信在我。無從責備。而彼轉得遂其強占侵越之謀。實於邊
界事宜。大有關係。不可不愼。臣等公同商酌。應再請

旨飭下奎昌暨福濟。懍遵現奉

諭旨。將來春應辦分界之事。照案查覈明確。豫為籌備。一俟該國

派人會辦奎昌即行迅速前往不准稍有推延貽誤邊防致干重咎。所有應需圖冊卷宗應由奎昌酌留一分備用。翰軍機大臣等。前因布倫托海大臣裁撤改派奎昌於來歲春融時馳往瑪呢圖嘎圖勒汗至哈已爾蘇一帶地方會同俄使查勘立界。嗣據福濟等奏陳窒礙情形。今文碩於明年正月到京。該處應辦事宜仍令奎昌與福濟籌辦。茲據總理各國事務衙門奏稱分界一事係屬已定成局。雖屢經反覆開導而俄使總以該處絕無朕蹤為詞。若奎昌稍事遷延該使徑行自辦則遂其強占侵越之謀其患不可勝言等語。西疆立界事宜亟應早為籌辦。奎昌前辦科布多分界頗臻妥協。此次應辦各事諒已

了於中。著卽據遵疊次諭旨。與福濟隨時籌商。將一切趕緊豫備。俟明歲春融時。先與該國會辦官員。約定日期。迅卽前往該處。妥慎辦理。不得因有福濟等前來。稍涉推延。致誤大局。應需圖冊卷宗。卽由該大臣酌留一分。以備查覈。奎昌起程後。科布多辦事需人。文碩著毋庸來京。卽赴新任。將該處應辦事宜。悉心經理。

癸丑。湖北巡撫郭柏蔭奏。承准軍機大臣字寄。同治八年十月初三日奉

上諭。中外定約以來。各督撫於民教爭訟案件。每以正兇未獲。人證未齊。為詞等因。欽此。臣伏讀之下。感悚難名。連卽督同兩司

訓齊素表。並遵委幹員。會同武昌府知府聶光譽。傳集祀
完。委係國民族。聽謠言。致與教民爭鬧。已將團首及保正
人等。量予薄懲。責令將被毀教堂及教民住屋。估價重修。
仍取其民教永遠相安。不許生事。各切結存案。該教士教
民人等。亦無異詞。案已完結。疊接上海道臬函。均稱該公
使羅淑亞。不日前赴漢口。而現在尚未得到實在啓行確
期。將來如果來漢。自當仰體。

朝廷恩意。善為囑屬。當不至激成事故。

御批知道了。

丙辰。協辦大學士胡廣總督李鴻章。成都將軍崇實。四川

總督吳棠奏。竊川省酉陽民教讎殺情形。經臣崇實等於
七年十二月間奏明在案。嗣因州城教堂被毀。各鄉積怨
方深。紛紛打教。州屬紙房溪教堂軍司鐸復糾眾殺斃團
民多命。兩造聚訟。礙難即時拏辦。先派知縣田秀畧馳往
接署州牧。會同委員曾傳道解散團眾。遣逐黔匪。商令軍
司鐸拆毀教堂。殿臺及附近寨堡。撫卹被難民教。嗣經總
理衙門會飭川東道錫珮。往西查辦。復因主教范若瑟他
往。無從議商。迨法使羅淑亞所派主教梅西滿來川。八月
始到。又飭錫珮與之會議。始終狡展。致未能迅速完結。該
使臣藉口在京免瀆。並欲帶兵入川要挾上煩。

宸屬臺蒙

諭旨訓誡嚴切。臣崇實、臣吳嵩、臣勝悚惶焦急之至。臣李鴻章於九月十八日行抵成都奉

旨會查。當因另有查辦要件。未便會商。先行調取案卷覈閱。十月初三日。先將大概情形稟奏。嗣疊奉十月初三十六二十等日寄

諭。遵卽會同臣崇實、臣吳嵩覆查。該州初稟打毀教堂。並未指明係何兇犯。田秀采今春履任後。拏獲劉幅。據供係何彩糾眾打教。而何彩業經逃逸。故將劉幅先行議辦。臣等又飛飭該地方官懸賞勒限。務獲何彩解訊。臣鴻章於十月二

十一日。由成都啟行。十一月初七日抵重慶暫駐。就近督飭川東道錫珮與該主教梅西滿妥速議辦。梅西滿疊次面謁。並函呈西陽州民教滋事原委節略。指控多人。臣調集人證案卷。並西陽官民先後稟控各執一詞。義其實在情節。由於同治四年西陽民人冉老五等毆斃馮教士後。該主教勒賠多金。勢鉅益張。本地痞匪入教者。倚勢欺壓平民。該處界連黔楚。民風素悍。積不相能。激成巨案。法使羅淑亞前與總理衙門議明。先辦李教士被殺之件。嗣又以張佩超為主謀。楊植庭為下手。劉幅為頂兇。臣等切實根究。適據張佩超遣其幼子張玉璞赴臣。滿率行轉。稟訴

冤屈。訛據張玉璞供稱。伊家素與教民張添興等有隙。四年馮教士案內。被教室牽控。將伊父張佩起。伊兄張玉璞。解往重慶羈押。經紳董勸令出錢脫帶。伊父認罰銀二萬兩。分年繳清。七年四月正在籌繳。被張添興等糾眾來家。藉索為名。強姦婦如。搶去銀二萬餘兩。並衣物等件。殺害雇工吳昌林等三人。並將伊兄張玉璞。扭送重慶管押。至本年八月二十日斃命。伊父張佩起。現年七十七歲。憂憤成疾。去冬西城打教。相離二百餘里。妻無主使情事等語。又楊模度即楊恒亭。查係已革武生。派充屯弁。與教民結訟被押。是日國民何彩等入城打教。將伊放出。該犯乘亂

入教堂報復。下手殺斃司鐸李國屬實。旋送至貴州思南府所屬黃泥坡。經該州訪聞。派差拏獲。詎該犯病重身故。飭起屍棺回州。帶同屍親鄰約及教堂管事人等。驗明填格取結在卷。臣鴻章接晤梅西滿。即將以上情節。詳細告知該主教偏信教民之言。總以張佩超為主謀。並謂楊楨庭卽係病斃。何彩日久未獲。其已獲之劉幅等。皆非正兇。礙難完案。正在籌議間。據署酉陽州知州曾傳道。署酉陽營遊擊范承先飛稟。懸立重賞。設法兇拏。已於十一月十四日夜。將首犯何彩擒獲。起解來渝。臣督同川東道及印委各員。親提研訊。據何彩供因教民龍秀元捆毆其母。又

倡勒朱永泰退婚是以懷忿起意糾眾焚毀教堂劉幅曾
占教等亦均入夥張佩超並未與謀等情又提訊劉幅曾
占教趙三關弗祥等均各供認隨同何彩打教惟情節微
有輕重自當分別擬辦臣等覆查羅淑亞梅西滿等必謂
張佩超主謀者一由張佩超係該州紳富與教中僻蒙素
深四年馮教士素誣攀勒罰二萬金除已繳八十兩外尚
欠一萬二十兩一由此素真正首犯未獲彼得任意妄指
以為挾制茲首犯何彩解到梅西滿意氣稍平教人者批
律有明條何彩雖因教民欺陵膽敢糾眾入城毀堂致斃
法國教士李國友教民多人實屬法無可貸應照例擬以

新立決。練法仗藉詞生靈不任稍稽顯戮。業於十一月三十日訊明正法。以儆效尤。楊楨庭係下手正犯。業經病故。應毋庸議。劉福隨同打教後。又與教民馬國應韓殿擬以絞監候。毋庸歸入秋審。隨時酌辦。曾占教係何彩從犯。擬以流二千里。趙毛蘭弟禧隨同助勢。龍秀元捆辱何彩之母。勒逼朱永泰退婚。致激眾忿。均擬滿徒。以上各犯分別懲辦。錫珮、田秀乘等。復開導梅西滿。允將張佩超上手尾欠銀兩。先行籌墊。並告以張佩超主謀現無證據。及何彩等供亦無主使之說。該主教已無異辭。至法國條約第三十六款內。應行追贖。著賠者責償。該教堂現被焚燒。若不

議賠必不甘服。梅西滿初欲索銀五萬兩。臣等再三計較。斷給銀一萬八千兩。彼已願照完案。臣鴻章已於二十九日。將此案議結情形。飛達劉行漢口法領事。轉達該公使知照矣。至軍司鐸殺斃國民多命。據梅西滿疊次訴稱。因被圍困。因缺食。其買糧教民。被匪截阻。護糧情急。互有傷亡等語。顯係飾詞庇護。曲為開脫。臣飭交司鐸軍輔臣來。林質訊。伊又云奉教皇令出洋議事。無從究詰。惟國民被害甚慘。檢查指控案據。訪問西陽官紳。皆以教民王學鼎。張添尊。易得揚。周得政。何奉祥。劉勝耀六人。同惡相濟。現係中國人。應由地方官設法拏辦。臣等已援照約章。及

羅使履總理衙門原函。明白諭知。梅西滿。暨檄飭川東道。督同該州上緊密拏。訊明後。酌照此次辦理何彰等罪名。分別重輕。立予懲辦。以昭平允。而服民心。

李鴻章又奏。臣鴻章前奉

旨飭令派員前往貴州。會同查辦遵義教案。當經奏委甘肅補用道員余思樞往查。旋准撫臣曾璧。悉將該處啟蒙原委。辦理情形。咨送前來。又據余思樞到遵後。疊次稟述各情。與曾璧先奏咨無異。趙教士實係在省身故。惟任主教謂其因傷。又不肯會驗。他處教士。有謂趙司鐸前在遵時。背脇受棍傷。入省後吐血斃命。因係傳聞一面之辭。事隔多日。

未必再能檢驗。誠如

聖諭。即可從此設法了結。臣已臆商曾壁光。如查係因傷。應查拏下手先犯。照例懲辦。否則相機與該主教定議。又據余思樞訪聞。仁懷本係林司鐸。其梅教士離仁懷已久。並無被殺之事。惟遵義民情强悍。久被教害。五月滋事後。紛紛逐教。顯違和約。現雖大致平靜。必須得力官紳主持開導。查有四川卽補道蹇閔。籍隸遵城。公正廉明。鄉望素優。臣已檄委該員會同余思樞等。蒞並函請曾壁光。委令總辦該郡團練。稍假事權。昨據蹇閔稟覆。遵民激於忿忿。打毀教堂。事後亦知悔懼。惟恐教士尋釁報復。其畏法之念。遂

不如畏禍之深。若急以相絕。轉恐愈形扞格。現與地方官
逐漸開導。曉以大義。如此次持平辨結。以後復准行教。必
果請撫臣諭商教士。明定規條。使民教一體。不至如前此
之欺壓善良。把持公事。但令大眾曉然於此。復並無深害。
當可宛轉聽從等語。自係實在情形。第該員頗避怨謗。謀
謀未遠。余思極現已追省。果商曾璧光妥議辨結。臣查趙
教士傷故。既無確證。梅教士又無被害之信。是情形並非
甚重。但須解勸遵民。後准行教。辦人賠堂等事。自可次第
就緒。此係地方官紳等專責。擬請

飭下撫臣曾璧光。責成遵義府縣。會同紳士。寒間等趕緊籌辦。嗣

後遇有教民涉訟。必須查照約章。由地方官持平裁辦。毫無偏袒。不准教士干預把持。及書差拉索拖累等弊。庶疑忿漸釋。而後患可消。

李鴻章又奏。再欽奉十月二十日寄

諭。李鴻章行抵重慶後。須將川黔兩案如何辦結奏明。再行回鄂等因。自應欽遵辦理。查法使羅淑亞。此次出京。因川黔兩案未結。兼及湖北。安慶。皆有新起教案。聲稱將帶兵船上駛。再由漢口以入川等語。自係虛聲恫喝。以相脅制。臣在成都初接此信。即與崇實。吳棠面議。竊料川黔山徑崎嶇。民情浮動。該使兵船本不得到。亦斷不敢帶兵深入。且外

洋水陸不能互用。法國並無陸兵在各海口。何從調集。若
彼自行前來。不過一教士等耳。惟川黔兩省。川省案情尤
重。該使在總理衙門。既將近一年。輾轉過深。難遽定議。
臣必先將此案籌辦就緒。以謝遣人而慰。

聖慮到渝。後督同該道錫珮等。與梅西滿往復開諭。幾於舌敝唇
焦。卒首犯何彩迅速就獲。伏誅。餘犯分別懲究。並允賠補
教堂。該主教輸服無辭。地方亦相安無事。至遲義一案。有
余思樞在彼。與該官紳設法勸導。固不必剋期強迫。亦不
至另激事端。早遲當可辨結。重慶距黔省近二十里。文報
往返甚速。臣在此久留。實無裨益。總理衙門來函。亦稱此

二案若能十一月內完結一件。帶兵入川之說。不煩言而自解。此論極中機要。況兩湖係數臣本任。帶印出省。瞬已奉和公事。多虞廢聞。天門教案初起。臣正登舟。今不知已否完結。該使兵船若至漢口。人心不免驚疑。私衷尤增焦。臣擬即已起程。曰小跡東下。正月初旬。或可抵省。如羅淑亞已至漢口。即將川黔近事。切實告知。以阻其行。

諭軍機大臣等。李鴻章。崇實。吳崇泰。議結酉陽教案。李鴻章奏。遵義教案。派員會辦。暨起程回鄂各摺片。酉陽州民教仇殺一案。疊經諭令李鴻章等。持平審辦。茲據奏稱。此案焚毀教堂。係首犯何彩起意。楊植庭乘亂入城。殺斃司鐸李國。均非張佩超主。

謀。現在楊損庭業經病故。何彰一犯已於訊明後正法。所燒教堂。並經給與梅西滿銀兩。餘犯劉幅等。均分別按律懲辦。著卽照該督等所議辦理。以示平允。酉陽重慶等處民教仇隙已深。今雖將此案辨結。而日後民教難處。崇實。吳崇等。必須設法防維。吳崇身任地方。更屬責無旁貸。所有各該處牧令等官。著隨時認真遴選。務令妥為整頓。不可稍存偏袒。致滋事端。未獲之教民王學鼎等六犯。卽著飭令川東道督屬嚴拏。務獲究辦。遵義一案。前經李鴻章派令道員余思樞馳往查辦。茲據奏稱。四川候補道蹇開籍。蘇達義。鄉望所歸。達民於打殺教堂後。亦知悔懼。請飭曾壁光。貴成。遵義府縣會同籌辦等語。著曾壁光卽

將遵義團練事宜。委令蹇開悉心經理。以便會同余思樞及該處府縣各官。將教案趕緊籌辦。毋稍牽掣。其梅教士有無被殺情事。並著飭令該員等徹底查明。毋稍含混。嗣後該省遇有教民涉訟。務須責令各地方官查照約章。持平叵辦。並將教士干預把持。及蓄差搗索拖累等弊。嚴為禁止。以消後患。前因曾璧光奏稱。黔省軍情緊急。請派大員籌辦。當經諭令李鴻章馳赴貴州。督辦軍務。李鴻章現以酉陽教案已結。天門教案初起。卽由川省起程東下。自係未奉到本月初七日諭旨。天門一案。前經郭柏蔭查明奏結。羅淑亞所帶兵船。自不至駛赴漢口。再圖滋擾。著卽據遵前旨。趕緊折回。入黔督軍追剿。

丁巳通商大臣兩江總督馬新貽奏竊臣於十月二十五日○欽奉十月二十日寄

諭前因川黔教案未結○法國使臣欲帶兵船入川○當經

諭令李鴻章等趕緊查明審結等因○欽此○又於十一月十二日○欽

奉十一月初六日寄

諭英翰奏○辦理考童滋開教士公寓大概情形一摺等因○欽此○臣

新貽承乏通商○兼有地方之責○深知緩急○何敢任地方官

稍涉延緩○致誤事宜○即經與安徽撫臣英翰先後彼此咨

會○欽遵

諭旨○會同迅速籌辦○所有安徽此案啟釁以來○及法國使臣到滬

後經臣處督飭在事印委各員設法辦理種種辦難情形已經歷次備具咨函並鈔錄往來文件詳細通知總理衙門在案緣其中辯論不無瑣屑外國人情性反覆靡常未經定局之先不敢以空言上瀆

宸聰今幸大致完結該使臣兵船一過皖城而去尚未另生枝節堪以仰慰

聖鑒臣謹將此起英法同時兩案前後議辦情節分別陳之查近年英法教士先後在皖城內租置房屋雖未建立天主堂而彼族就其寓所開堂傳教謂之教堂遇有事端即執定謂與滋聞天主堂無異其英人之信奉耶穌與法人之崇

奉天主異派同源各立門戶亦不能為稍分軒輊者所以
彼族稱有安慶折毀天主教堂耶穌書院之說也經臣派
員赴皖查見房屋實未折毀而門窗則搬搶一空其家居
什物拋毀多少無從追問以致該教士任意浮購究之辨
理為難之處猶不在賠款也先是臣慮及英國使臣阿禮
國通以巡視通商海口亦到滬上若因安慶教案遂與法
國合力與我為難則事機倍形棘手比阿使到滬詢知臣
處亦先派大員前往查辦頗為心折迨至金陵面晤臣即
允以拏辦滋事之人及酌償教士夫款並以皖省現值考
試萬眾雲集易滋事端未能倉猝即從嚴辦實情開誠布

公向其告知該使去後雖屢由領事申請催辦並索賠款尚無格外刁難之處其法使羅淑亞未經到滬之先臣會商撫臣丁日昌以現署蘇州臬司候補道杜文瀾甫卸署上海道篆熟習洋務情形其平日亦為法領事等所信服派令以他事先期赴滬豫備接晤法使冀得有所開解無如該使挾盛氣而來到滬開談以教案須就近從安慶一案清理脅制要求多不近情至請於皖城內指一官地如倉廩衙署之類撥作堂基而以此案應賠失款五千圓由官代為建堂償還教士此層尤為無理由杜文瀾稟經臣駁斥不允並以便員赴滬時密屬嚴飭在事各員以此層

無論如何萬萬不可輕許。而今設法以異廉之。仍於爭論時。專就賠款一層與議。其錢數多少。則以羅酋及金韓二教士所說各數參酌盈縮。明知其不能過減。但恐允給太易。又啟其別項希冀。臣故仍持裁減之議。不敢遽從寬假。亦以羅使一味虛憍。池上各員。不得不委曲從事。莫能面設辯論。遇有閹繫大體之處。臣仍自加扶擇。不使順流直下。正以力求歸宿。惟有孥人一層。必拘定教士指認之人。則皖省現值考試。實有為難。疊准撫臣英翰咨函。及安慶府縣來稟。總以羅使於該處考試未竣之前。萬不可以來皖。必須緩至臘月半後。方可辦理等語。蓋以各屬文武生

童齊集最易藉端生事。此案拏人一節。若操之太急。眾憤益增。既於成事無所補救。轉致枝節另生。更難措手。而羅使則始終以曉案若不切實辨定。伊必卽日赴皖。自行辦理。挾此意以觀望嘗試。冀逞所欲。以故來甯之期。屢屢遷延。最後有到甯時。為於城內豫置一潔淨公館。暫住之。請適其時。法副領事先到漢口一行。亦以此意向漢關道鄭蘭言及。同時漢泡來信。不謀而合。殊不測其用意所在。臣以該公使此次係自赴各口辦案。並非奉有彼國明文條約。亦無必須城內豫備公館等說。力持不可。飭令上元縣為於水西門外。指一公廨。以待其登岸暫寓。別無供應。且

議定該使到後。卽由臣與之商論。將皖案曲折情形。婉為
剖析。或冀稍得平允。嗣於十八日。接據署臬司杜文瀾。上
海道涂宗瀛來稟。已在滬上與之議定。查照所開教士失
物等項。價洋四千圓。由滬先行墊付三千圓。以一千圓存
留安省。為將來教士購地之用。派一委員同教士卽日赴
皖。指出城內地址一塊。由地方官為之買定。以及懲辦滋
事之人。並出示申明條約各情。當經鈔稟咨達總理衙門
去後。杜文瀾旋卽來甯。面稟前情。羅使亦卽於十一月二
十一日。帶大小兵船四隻同到。次日率其領事人等來署
會晤。當面尚無要求之處。詞貌甚恭。亦無爭辯。坐不久卽

辭退。自寓於城內教堂公所。次日臣亦照舊式答拜。其水師提督高爾業。正領事梅讓。於二十五日生二號兵船一隻。先行回港。連日飭由杜道及洋務委員候補道吳世熊與該副領事狄隆會議。統案該副苗通華言。久於港上。最為狡詐。謬託恭順。陰逞無賴。所言多不近情理。羅使性本暴躁。加以教士百端慝惑。偏值又傳聞安徽建德縣有害教民之事。雖未知真偽。而該苗言之鑿鑿。並令自建逃來教民。述其情節。以實其言。因是更為費手。此外又欲於江甯教堂寓所西首。添買隙地一塊。以及議論江西各案。無不堅持其說。臣隨時加以裁抑。往返數四。費盡辭說。稍能

就我範圍。惟墊償之款。業已先給。無從翻悔。羅使更以在
港議定辦法。堅執為一成不易。相待至二十八日。始經商
定。送去照會。該使已無異說。二十九日。天明後開船上駛。
止帶小兵船二隻。其頭號大兵船。暫停此處。隨後或回上
海。臣處亦姑置不問。示以無所顧畏之意。臣並與該使約
定。到皖時。不必登岸入城。而於該使未行之先。派員由輪
船駛到安慶。將一切情事。致意撫臣英翰。並泐函詳細告
之。以此案賠償之數。本難過於減少。其他各層辦法。亦均
無不合條約。及損失大體之處。城內購地一節。尚可於臨
時相機辦理。斟酌合宜。旋准英翰覆函。及署安廬道劉傳

祺來粵具言法使於初一日舟抵安慶。劉傳祺遵飭前往
接晤。並先由副領事狄隆交去照會及告示等件。所云先
將倡首滋事之人出示扣考。再行查拏嚴辦。並許以委員
查訊建德近日一案。仍先查明被累教民。加以撫卹各節。
悉仍金陵原議。惟指空地一層。於照會內略參活筆。添敘
衡山頭地主。僮或不肯出賣。或於城內另買合宜之地。起
蓋教堂等語。該使並無異詞。亦不進城拜晤。即於次日開
船前赴九江矣。其英教士失款。前已據領事單開之數。給
洋一千七百餘圓。大致亦為了結。所有兩項賠償洋款。由
皖先後解滬。分別歸墊轉交。謹會同安徽巡撫臣英翰。江

蘇巡撫臣丁日昌。各詞恭摺具陳。

御批該衙門知道。片併發。

馬新貽又奏。再。臣先於十月初八日。欽奉寄

諭一道。以法使羅淑亞有帶同兵船前赴江西等處辦理教案之語。當即欽遵。

諭旨。分別飛行各處。務於該使到時。按約以禮接待。遇事開解等因。去後。此次出京。其初意原不為安慶之案而來。迨經滬上各員與之接晤。察看光景。其入江之舉動。勢難勸阻。經臣疊次咨函。商催江鄂二省。各將教案迅速了結。免致藉口。查江省有南康新昌廬陵吉安等處之案。起數雖多。均

尚易了。鄂省止有天門縣一案。焚毀教堂及教民房產。聞
數不少。賠款稍巨。節准江西撫臣劉坤一。湖北撫臣郭柏
蔭。咨函聲覆。各已辦有眉目。由臣先行分起。咨明總理衙
門。其如何辨結緣由。江鄂二省。自必詳晰具奏。竊意法使
前往。亦已無甚指摘。茲於初八日。接據九江關道景福稟
報。羅使由皖駛抵該關。接晤之頃。查詢已未結各案。多方
挑剔。任意要求。經該關道隨機答付。頗能力持大體。該使
堅以進省建堂傳教一節。必須面見撫臣商辦。阻之不可。
卽於初六日起碇下駛。又據臣處派委護送之道員姚曦
飛稟云。該使行抵湖口。兵船聞淺。不能前進。已換坐火輪。

船小划船晉省各等語。該使舉動輕躁。到省後仍必有許多要挾。撫臣劉坤一自能按約辯論。妥為辦理。現尚未准咨函知照。除將景福來書。隨咨先行鈔送總理衙門查照外。謹附片具陳。

御批覽

成都將軍崇實。四川總督吳棠奏。苗逆慣用綫槍。兼能及遠。我軍非精習火器。無以制賊之死命。前經飭局籌款。委員採辦開花洋礮洋槍等件。解交援黔各營。以利攻剿。據道員唐炯稟稱。開花礮須洋人施放。方能有準。洋槍亦須洋人授以步法。曾派人前往漢口。延請英商麥士尼到營。

盡心教習。備極精勤。前次克復黃平州等城。該商皆隨提督劉鶴齡身在前敵。先後斃賊二百餘名。屢著勞績等情。臣等查英商麥士尼。勤於教習。功效可觀。且慕義向風。願改遵我

朝服色。效力行間。以槍擊苗。無不應手立斃。尤屬奮勉可嘉。合無籲懇

天恩。俯准將該商麥士尼

賞給參將銜。並

賞戴花翎。以示鼓勵懷柔之至意。

御批該衙門議奏。

壬戌總理各國事務恭親王等奏。同治八年九月十九日。
臣衙門具奏辦理英國條約事宜。現已定議一摺。並照錄
條款章程稅則恭呈。

御覽。是日臣等即與英國使臣阿禮國在署先行公同畫押蓋用
關防。並將日後如何開辦及另議各節彼此互相照會。以
資信守。阿禮國旋即出京回國。伏查從前各國條約最難
措手者。惟中國如有施恩利益。各國一體均霑等語。數年
來遇有互相牽引十分掣肘。此次修約為各國倡始。若不
將此節辨明。予以限制。則一國利益。各國均霑。此國章程
彼國不守。其弊為可勝言。因督飭辦理章京設法與之辨

論將彼此所允逐款酌勻。明示各國以欲得此款之益。卽當恪遵此款之章。不得仍前藉口均處。止揀利益。其間如第一第二第三第七第八第九第十四各條。中國所允。或係舊約本有此款。或係向來辦法。並非新允章程。不過重言申明。藉示均平之義。獨於第十二十三洋藥絲斤加稅兩條下。將中國現允各條。層層開列。蓋以各國通商志在謀利。必加稅以難之。使知該國若有要求。中國卽增稅項。庶可杜將來洋商覬覦之心。其實現允各條。久為各國所力爭。不允不休。不知稅務亦難再阻止。非真欲以彼易此也。昨據南洋通商大臣咨送新聞紙。內有各洋商會議以

洋藥湖絲加稅太重。欲求該國君主等諒。是此二款。將來
能否照辦。尚未可知。如果該國不肯遵行。則中國所允。亦
不開辦。更為有辭。第此係洋商私論。該國未必竟自聽從。
況新約互換。並無限期。所有應辦一切事宜。自應豫為籌
畫。以期周密。現由臣衙門將善後辦法。摘舉大概。函致南
北通商大臣悉心妥籌。早為布置。以免臨時周折。至進口
大宗洋貨。正子並交新章。亦於稅項不無裨益。第恐洋商
勾串華商。將此項洋貨。冒名華商。私行運進。不通商各口。
則正子一並偷漏。殊於帑項有礙。相應請

旨飭下戶部。將如何防範之處。會同臣衙門豫行妥定章程。俟新

約開辦時通行知照各口地方官一體遵照方為妥善其將來洋藥湖絲所加稅銀亦應請

飭戶部另款存儲以備不時之需無論內外何項概不得奏請動撥庶幾積久可成鉅款

御批依議

給英國照會

為照會事案查增修條約第十六款內載恭候

御筆批准進行

特派大臣在

大清京師會晤互文等語現在兩國大臣已先為親筆畫押所

有日後在京互交應行開辦之時。原應卽遵辦理。惟事關
通商大局。仍應先行議明。除兩國彼此互相情願照辦各
條外。其餘各條。均俟有約各國。將凡得其益則守其事一
節允准後。再為照辦施行。現在彼此又允各將此次增修
條約。知會有約各國一體照行。以免開辦無期之虞。而防
一事兩歧之患。至第三條所擬洋貨三類。正于兩稅並交。
通商省分。概不重徵一節。現經訂明。將牛莊一口。暫時不
載此例之內。俟日後再議。方可一律辦理。至第六第十三
兩條內載。將溫州、蕪湖兩口。作為通商口岸一節。現經訂
明。俟日後開辦後。方准英商來往居住。其取益防損各節。

均照其餘各通商口岸無異。至第十款引水各節。現經訂明。凡屬中國海面江面。中國有自主之權。有例行各事者。並通商口岸所訂附近水面之章程。由英國曉示英商英船。一體恪守。則中國將沿海沿江口岸。應行辦理之明燈。望樓塔表浮樁。並差派巡役及防護水路各節。皆為陸續在於船鈔項下撥用經費辦理。均由總稅務司將各節所用銀數。附載稅冊。以便共見共聞。除由兩國大臣將增修條約畫押蓋印外。合將另議訂明各節。同日照會貴大臣存案備查施行可也。

恭親王等又奏。再據軍機處鈔交成都將軍崇實等片奏。

內稱英商麥士尼隨同提督劉鶚。克復黃平州等城。擬請給與參將銜。並戴花翎等因。同治八年十二月二十日奉

旨。該衙門議奏。欽此。伏查外國員弁在中國製造器械。裨要工等事。得邀優獎者。均有案可稽。茲據該將軍等奏稱。英商麥士尼教習已有成效。屢次著績行間。並經隨同克復城池。且願改遵中國服色。實屬真心效力。未便阻其向化之誠。臣等公同商酌。應如該將軍等所請。將英商麥士尼仰懇

天恩。給予參將銜。並

賞戴花翎以示優異而資觀感。

御批依議。

甲子山西巡撫李宗義奏竊於同治八年十月初三日奉上諭據總理各國事務衙門奏稱法國使臣以西陽逆義兩案未結。應列湖北山西河南廣東未結各案。藉詞要挾。即著分別迅結等因。欽此。當即分別移咨察哈爾都統並飛飭豐鎮廳會同旗勇傳集人證。趕緊飭訊。一面飭委大同府知府馳往會辦。以期迅速審結。茲據大同府知府程豫察哈爾右司員外郎承恩豐鎮廳同知成錦會詳稱。邊查教民段振舉等前以租種承啟荒地並未欠租。地方官詐銀二百餘兩。勒

偏交地等情。在法國使臣處呈控。由總理各國事務衙門
咨經前撫臣行司。飭委前任大同府會同豐鎮廳協同傅
凱。承啟係屬功臣後裔。其家丁盧太。因未查明原賞地畝。
誤將世管佐領牧地。並續賞馬廄。疊次招墾。得受押荒錢
文。經連界各佐領控其越界私墾。承啟遂疑原收地租。尚
有不實。託姻親張建廷。轉向各地戶加增租資。或另行招
墾。地戶段振舉等。因其故父段佑。暨各地戶先人墾荒成
熟。歷數十年。並於該處建蓋房屋。已成村落。均不肯將地
退還。該民人傅魁。勸令各地戶攤加地租銀二百三兩。交
與張建廷轉給承啟。房地仍令住種。段振舉等因未奉旗

廳准其住種明文。恐日後復加租。是以赴京呈控。隨斷令段振舉等各照舊址。暫行耕種。張建廷所收加租銀兩。照數追交段振舉等收領。咨覆銷案。嗣准總理各國事務衙門咨稱。據法國使臣送來教民認種地段清單一紙。令卽轉飭豐鎮廳。將教民所種地段。照依清單。量定畝數。覈准稅額。蓋印給與執照。迅速妥辦等因。當據地主承啟及家丁盧太以租給教民段振舉等地畝。內有與正黃旗牧地。及祐安等寺諷經香火地毗連。必須會同該旗暨喇嘛等。先將地界指明。方免弊端。並經該廳詳請旗員會辦。非因人證不齊。卽係旗員未到。展轉遲延。迄未辨結。本年十

月該府等奉到後。訂期會同正黃旗總管佐領。並祐安寺喇嘛。傳集地主承放地戶。段振舉等。齊詣二道河地方。該佐領指明正黃旗牧地。以土梁底為界。喇嘛等請令段振舉等將腦包西面北面各退地三里。又留上山寬闊走路一條。仍為該寺祭祀誦經香火之地。段振舉等亦即情願照數退出。隨照段振舉等所執約據二十三張。內開四至八到。一律勘明。約計熟地一百餘頃。與蒙古牧地並無妨礙。地主承啟亦願將從前得過押荒錢文作為地價。寫立約據。將地推與段振舉等永遠管業。大量陞科。段振舉等均各輸服。佐領喇嘛亦無異詞。願其結領完案。本應即依

界址挑挖濠溝。照創大量墾科。永斷葛藤。但目下冰雪在地。不特濠溝難挖。卽地畝亦難逐段丈量。隨於各界上眼同該佐領等釘立界牌。先行結案。俟來春冰泮。由堂鎮廳督令段振舉等挑挖濠溝。大地報墾。另案辦理。並將承放寫立推地約據。蓋用廳印。交段振舉等收執。兩造允服。取具各結領附卷等情。詳請奏明前來。臣覆覈無異。除將全案另咨總理各國事務衙門查照外。合先恭摺馳奏。

御批該衙門知道

華辨夷務始末卷之七十